


Mud Volapüka

Nüm 72

1 setul 2017

Küpet

Timü tumyel 21id nuik mögos ad ceinön nünodi alseimik ad sökod jöletas e sunädo lovesedön oni love bevüresod lü men alik. Davoätos, das bü degyels te ömik ad kosükön oki ko ek mens änedons ad gebön kosädamedömis nekonfidovik e nevifik: telefonöm e pot< ed ädredälons demü utos, das kosam onas ukanon paropön dub dinäds no pebüosenöl (fealotäd, krig e rets). To atos, vemo plidob ad dastebedön e tuvön penedi pö potabog obik.



Potakad Volapükakluba: ‚Märalän‘.

Bukemaboed

Fövot lekoned-mära yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Kapit teldegtelid. Milag cinikama.

Ün göd fovik Blövalogikan ekömof ini malädanöp ed enotükof Pulnomare, das hicilils pi=libüköl noe flapoms eki pö süts abgüä bitoms dasamiko ed igo yufoms jicililis ad deblinön podis. Pulnomar esagof:

„Atos binon gudiku, das icälodor jäfi pötöfik pro hicilils. Ubegob ore ad jäfükön Boülani e Perönülani pu=libüköls adelo.“

„Mögos-li ad libükön eki zuo?“ - Blövalogikan ebegof. - „Binos lügiku ad stöpädön [kipön] hicililis ön fanäbam, kü vobod so nitedik dabinon pro atans.“

„Ga ilibükob nedisiniko Baülani e Spidülani ädelo.“ - Pulnomar egesagof. - „Vo-li atos no binon saidiku?“

„Si, nesaidiko.“

„Täno mögos ad libükön Seilani. Binom vemo lobediäliku e no äböladam obi me begs seimik.“

„Ab kimi nog mögos ad libükön?“

Pulnomar elenükof lüni ed elülogedof lü lised.

„Mögos ad libükön Bastetüli e Sirupüli. Koo binoms lobediäliku. Ab veräto no dalos ad libükön Bastetüli demü utos, das fidom svidis mödik. No nog eplöpob ad koedön leditön omi de döfäd at. Ifi te äfidomöv onis! Ab i besteigädome pokis valiks okik me svids ed igo klänedom onis disi kapakusen. Ba, pötit omik uläsikon-la boso pö lib. Ab koo sötos ad kipön Sirupüli is as pönod demü utos, das drinom karbatazüdavati ko sirup mödiki. Too sötos



libükön etanis demü utos, das äplütoms kol ob.“

Pulnomar dönu ädulogof lisedi.

„Binos tusuniko ad libükön Glöbülü.“ - esagof - „Lög omik no nog esanikon. Glöbül binom malädanu voik.“

„Ab libükön Murülani-li?“ - Blövalogikan esäkof.

„Nö, nö!“ - Pulnomar evokädofof. - „Murülan at binom lu=manu so neplitik! Ai murom, ai favom demü bos. Skänom valikanis. Ostadomös is kodä binom so nebalamoviku, do veräto ulelivükoböv obi de atan e de Pilulülan nesufovik at, kel demü kod nesevädik lecedom oki sanani ed ai steifom ad blöfön, das lekäla=mods obik binons neverätiku. Lekälamods obik! Fomälörös atos!“

„Täno libükorös etanis bofik, dat no oböladoms ori.“ - Blövalogikan emobof.

„Ag, lenö! Sevor-li utosi, kelosi Pilulülan lenaudodik at isagom obe änu? Isagom, das noe saunükob malädanis abgüä fägob ad koedön vedön saunikanis malädans. Nesev kion! Nö, sio okipob omi is ünü tüt zesüdik lölik. No usegolom de is sunikumo. E Murülan koo.“

Kludo Blövalogikan edagetof, das plä Boülan e Perönülan nog Seilan, Bastetül e Sirupül pe=libükoms de malädanöp. Glöbül, Murülan e Pilulülan äblliboms tö malädanöp. Glöbül stiliko äsufälom negidi somik, bi lög omik nog ädolon,



ab Murulan e Pilululan äprimikoms ad desleitön heris [de kap] oksik demü skan ed estetoms, das üf no ulibükoy omis jü soar tän ofugoms.

Skrubül, Lebuonül e Luibül egalikoms mugödo e dönu eprimoms ad nätükön toodi. Sol esülöpikon ya vemo, kü tood fino ebruvon e motor eprimon ad jäfidön. Flens kil esludoms ad dunön vegami blufik. Ävabölo zü dom ed ekodölo püfalefogi, edevaboms plödü yan ed äspidoms [ärönoms] ve süt. Suno eküpoms jicililis, kels äklopofs [ädeblinofs] flukis. Spidulan, Perönulan e Baulan kobü Boulan äseadoms pö podabim. Nilo Lür, Seilan e Libelul ävobons [seadölo] pö bünep. Jicilils ziliko ärölofs podis äl flans valik. Nenolikan ärörom vü vob-öl-ans e lejuitölo älebüdom:

„Menis lul usio, menis lul isio! Gleipolsöd podi at e rölolsöd oni! Pödiö, maleditilö! Bün ufalon anu isio! He! O ols, us löpo, nunedolsöd büo! Flaniö, voto udogolob [udojedob] olis!“

Atos valik mögos ad dunön nen noid, ab Nenolikan äniludom, das if ustopedom ad noidön, tän vob löliko ustopikon.

Sirupül e Bastetül koo ävoboms. Äröloms büni, ab büni no ärolon äl flan zesüdik. Alikan sevon, das fom büna vemo distikon de podafom, ed if röloy büni tän ut zü-rolon zi top semik. Zü bün äbinon vemo moliku. Pe-fronulon dub dofal de bim, zuo Sirupül e Bastetül, ärölölo [oni], vemo edafronüloms oni. Sekü atos emiotoms okis löliko [de lögs jü kap] me vaet svidik ed ai ädeläkoms nämis oksik.

„Kikodo flekols olis zü top bal? Ya efi-dafronülols büni lölik!“ - Nenolikan äzunetom etanis. - „Ba-li, esludols ad jäfidön sirupi de on? Sirupi nonik!“

Estöpölo toodi, Skrubül e Lebuonül äküpedoms atosi.



„He, o Nenolikan!“ - Skrubül evokom. - „Kikodo no gebols cinikami?“

„Zö!“ - Nenolikan erefudom. - „No plöpobs ad bemästikön podis, ab flagol cinikami!.. Kiöpao kanob dagetön cinikami?“

„Ekö! Cin bal ya komon.“ - Luibül egesagom.

„Vo-li cin malon cinikami?“

„Lesi, atos siämon cinikami. Oveigobs podis e bünis me tood.“

„Yö!“ - Nenolikan evokädom. - „Edatikob! Ekö, lü=vabols lü bim - anu udojedobs podi ebo sui tood.“

„Stopö!, atos nemögon.“ - Skrubül esagom. - „If jedoy podis ini tood ebo de bim, tän ed ufi=dafronüloy podis ed ubreikoy toodi.“

„Täno oblinobsös-li podis de bim me te nams bai ced olis üfo?“

„Kikodo me nams? Odonükobsös podis me jain.“

„Benö!..“ - Nenolikan ävokom. - „O jicilils, blinolsöd jaini isio!“

Jicilils vifiko elüblinofs jaini. Nenolikan esumom oni ed eprimom ad xamön oni pö flans valik. No äsevob vio träitön jaini e bluviko älogetom oni. Poso esimulom, das edagetom tiketi seimik, elütenükom jaini Skrubüle ed esagom:

„Ekö, dunolöd.“



Skrubül elovejedom jaini love tuig podabima ed ebüdom Spidülane ad fimatanön finoti löpik jaina len kaul pada. Jicililes anik ebüdom ad gleipön finoti votik.

„Nu saovolöd!“ - atan elüvokädome Spidülani.

Pos minuts anik kaul pe=du=saovon e pod älagon me jain. Skrubül ebüdom Luibüle ad lümüfön toodi [lüvabön] ebo disi pod lagöl. Jicilils eprimofs ad sägleipön jaini pianiko. Pod edonikon ebo ini tood. Jain pe=sä=tanon e tood äveigon podi lü dom.

„Nu ulüblinobs toodi telid.“ - Luibül esagom. Enüdranoms ini tood ed edevaboms lü garad, pö kel tood Luibüla äbllibon. Pos minuts anik egekömoms pö toods tel. Tood bal äveigon podis, votik - bünis.

„Ädaküpols-li milagis cinikama?“ - Nenolikan äsagom pleidülo. - „Bo, o jicilils, igo no äbüocedols atos!“

Reidolsös fövoti konota pö nüm fovik.